



PRESSITEEDÜS

30. mai 2010

Põlvan Indsikurmun peetü võrokeelitse laulupido Uma Pido pääkontsõrdist võtsa ossa 7000 inemist

29. mail 2010 Põlvan Indsikurmun peetü võrokeelitse laulupido pääkontsõrdist võtsõ üten esinejidega ossa 7000 inemise ümbre. Kõrraldustoimkunna edimäidsi kokkovõttide perrä läts laulupido väega häste kõrda. Nii nakatuspäiv ku ka terve pidopäävä programm ja õdagunõ kontsõrt lätsi' ilosahe ja sündmus läts tävve ette – kõik nõstsõ nättävä kotussõ pääle võro keele ja võrokõsõs olõmisõ.

Uma Pido lavastaja Raivo Trass jäi pido lavalõsäädmisega väega rahule ja üteli, et kõik läts nii, nagu taheti. "Ma sai tuu, midä ma paikkundligõ laulõ man saia' tahtsõ. Murdõkeeline sõna ja viisi vägi ja tandsu energia tüütivä' ütenkuun häste ja tõiva' vällä esimuudu kujondiid, miä kõik sändsel pidol tarviligu ja uma kotussõ pääl olli'," võtsõ Trass pidotundõ' kokko.

Uma Pido koorijuhtõ päälük Saidi Tammeorg om niisamatõ rahul. "Super! Kõik oll väega hää! Ma olõ kõgõst süämest tenolik koorijuhtõlõ, lauljilõ, kunstnigulõ, lavastajalõ ja kõigilõ asjaliisile, kiä sändse õhkkunna luvva' mõistsõva'," üteli Tammeorg õkvalt päält pidokontsõrti.

Laulupido projektijuht Triinu Ojar kõnõlõs, et täl om kõgõ parõmb miil tuu üle, et läts kõrda tuvva' vällä vana Võromaa kihlkundlik vaim, näüdätä ummi juuri tähtsüst ja lõunaestilist nalalist ilmakaemist. "Rajoonipiiri' meid es piä'," om Ojar rõõmus, et oll tunda' maakunnapiirest üle olõvat üts-olõmisõ tunnõt terven võro keele- ja kultuuriruumin.

Triinu Ojar tennäs pido kõrdamineki iist väega hääd publikut, niisamatõ kõiki tugõjit ja kuuntüüpartneriid. "Hää miiskund ja hää tugõja' anni' alussõ pido kõrraldusõlõ; hääd esinejä' ja hää publik anni' uma kõgõ parõmba, et pido läässi kõrda," kõnõl Ojar. Kõrraldaja' tundva' rõõmu ka tuust, et kõik läts häste, ka kõrraldusõ, nii liikluskõrraldusõ ku majandusasu poolõ pääl ja eräle om hää miil tuust, et ütteri tõsist asja es piä lahendama ei kiirabi ei politsei.

"Kimmähe ei jää' seo Uma Pido viimätses, a kokkovõttit teten küsümi kõigi arvamist, kas om õigõ jakada üle üte aastaga nagu edimält plaaniti. Tuu om kimmäs, et vahtsõ pido kotussõs om jälki Võro ja Kubija laululava," üteli Ojar edespõditse poolõ kaiõn.

Rekonstrueeritu Indsikurmu laululava olõ-i uma eloaos joosul nii suurt hulka lauljiti ja publikut nännü ku olu pidol, ku laulukarõ all oll kuun 3300 lauljati ja publikuna kai pito 3700 inemise ümbre. Uma Pido nakas nakatuspääväga joba 29. mail. Sõs olli' kontsõrdi' Põlva Maarja kerikun, nelärattaliidsi mootorilda sõiduriistu mäest ala kupataminõ ja Uma Pido tulõ palamapandminõ ja hoitminõ Taivaskuan. Uma Pido pidopäiv naas joba kell 8 hummogu käsitüülaadaga. Programmin olli' viil uulitsakontsõrdi' ja tüütarõ' ja rongikäük, miä õdagudsõ pääkontsõrdi sisse juhat. Õdak sai läbi simmaniga, kon mängse' Heino Tartes ja sõbra'.

Võrokeelitse laulu- ja rahvapido traditsiooni jakkav II Uma Pido tõi ütirdse laulukarõ ala inemiisi nii Põlva-, Võru-, Tartu- ja Valgamaalt, a ka muialt Eestist ja viil Lätist ja Suumõst. Taa om võro keele ja paikkundliku kultuuri pido, kon kitetäs võro kultuuri ja võrokõsõs olõmist ja näüdätäs tuud sõbrulõ ja tutvilõ muialt. Uma Pido lõugahusõs valitu "Ku keskkotus kimmäs, sõs ladva' laulva'" kõnõlõs võrokõsõs olõmisõst ja võrokeelitsest kultuurist ku elojovvulidsõst puust ku juurõ' omma kimmähe maa seen ja tukõv tüvi nõsõs korgustõ, sõs saa ladõv tuulõn vabalt laulda'.

Võrokeelitse laulupido Uma Pido kõrraldajis omma' MTÜ Võro Selts VKKF kuun Võru Instituudi, Põlva liinavalitsuse, Põlva ja Võro maavalitsuisi ja Põlva kandi MTÜde ja seltsega

ja kultuurielo iistvõtjidega. Uma Pido meediapartneri' omma' Maaleht, Eesti Ekspress, Uma Leht, Lõunaleht, Võrumaa Teataja ja Raadio Marta.

Ettevõtmist tugõsiva' Eesti Kultuurkapital (rahvakultuuri sihtkapital, Võru- ja Põlvamaa ekspertgrupi'), Kultuuriministeerium, Rahvakultuuri arendus- ja koolituskeskus, Piiriveere Liider, Võrumaa Partnerluskogu, Võru Instituut, Võru ja Põlva maavalitsuse', Võrumaa ja Põlvamaa umavalitsuisi liidu', Võru, Rápina, Taheva ja Sõmerpalu vallavalitsuse', Nopri Talumeierei, Lõuna Pagarid, Arke lihatõõstus ja Loovagentuur Maailm.

Teedüst saa mano:

Triinu Ojar, pääkõrraldaja
tel 533 22 153
e-post triinu.ojar@wi.werro.ee
www.umapido.ee

Pressiteedüse and edesi:
Mari-Liisa Parder
Uma Pido kommunikatsioonipäälik
Tel: 50 52 517
mariliisa.p@gmail.com